



Mabwysiadu

Canllaw i ddefnyddwyr y llys teulu

I bwy y mae'r daflen hon?

Bwriedir y daflen hon ar gyfer unrhyw un sy'n meddwl am wneud cais i lys teulu am orchymyn mabwysiadu dan Ddeddf Mabwysiadu a Phlant 2002. Y mae hefyd i'w defnyddio gan weithwyr proffesiynol ym meysydd materion cyfreithiol a gofal plant sy'n gysylltiedig â'r broses fabwysiadu.

Mae'r daflen yn rhoi gwybodaeth gyffredinol ynghylch pwy gaiff fabwysiadu plentyn, pa wybodaeth fydd y llys ei hangen, a sut bydd y llys yn ymdrin â'ch cais. Fe'i bwriedir fel canllaw yn unig. Nid yw'n rhoi cyngor i chi ynglŷn â phenderfynu a ydych am fabwysiadu plentyn ai peidio, nid yw'n ddatganiad cyflawn o'r gyfraith, ac nid yw ychwaith yn ymdrin â'r holl benderfyniadau ynghylch mabwysiadu y gall y llysoedd eu gwneud dan Ddeddf Mabwysiadu a Phlant 2002.

Gallwch gael cyngor a mwy o wybodaeth am fabwysiadu (ac ynghylch dewisiadau posibl eraill yn hytrach na mabwysiadu, megis gorchmynion cyfrifoldeb llys-rieni neu orchmynion gwarcheidiaeth arbennig) oddi wrth: eich awdurdod lleol; asiantaeth fabwysiadu gymeradwy; cyfreithiwr, Canolfan Cyngor ar Bopeth neu ganolfan y gyfraith neu ganolfan cyngor cyfreithiol. Mae Taflenni CB1 - Plant a'r llysoedd teulu a CB4 - *Gwarcheidiaeth Arbennig - canllawiau i ddefnyddwyr llys*, hefyd yn rhoi mwy o wybodaeth.

Efallai y gallwch gael cyngor a help cyfreithiol yn rhad ac am ddim. Ewch ar-lein i www.gov.uk/legal-aid i gael rhagor o wybodaeth.

Nid yw'r daflen hon yn ymdrin â mabwysiadu plant o wledydd tramor. Os ydych yn meddwl mabwysiadu plentyn y mae ei gartref parhaol y tu allan i Ynysoedd Prydain, gellir cael cyngor gan: eich awdurdod lleol, asiantaeth fabwysiadu gymeradwy, cyfreithiwr, canolfan y gyfraith neu ganolfan cyngor cyfreithiol; Canolfan Cyngor ar Bopeth; neu ar-lein yn www.direct.gov.uk/en/parents/adoptionfosteringandchildrenincare/adoptionandfostering/DG_4018296.

Mae taflen A21 *Mabwysiadu Rhyng-wladol – cyfarwyddyd*, hefyd yn rhoi rhagor o wybodaeth am fabwysiadu plentyn o wlad dramor. Gallwch gael copi gan unrhyw lys teulu neu ar-lein drwy hmctsformfinder.justice.gov.uk.

Pwy all wneud cais am orchymyn mabwysiadu?

Gall cwpl wneud cais i fabwysiadu plentyn ar yr amod, ar yr adeg pan wneir y gorchymyn mabwysiadu:

- bod y ddau ohonynt yn 21 oed o leiaf, neu
- bod un ohonynt yn fam, yn dad neu'n rhiant arall i'r plentyn sydd i'w fabwysiadu, ac yn 18 oed o leiaf, a bod y llall yn 21 oed o leiaf; a
- bod o leiaf un o'r cwpl yn preswyllo mewn rhan o Ynysoedd Prydain, neu
- bod y ddau aelod o'r cwpl wedi bod yn preswyllo'n arferol mewn rhan o Ynysoedd Prydain am gyfnod o flwyddyn o leiaf, gan ddiweddu gyda dyddiad y cais i'r llys hwn.
- unrhyw riant arall sydd â chyfrifoldeb rhiant dros y plentyn (gan gynnwys llys-riant).

Dyma'r diffiniadau ar gyfer 'Rhiant Arall';

- Benyw sydd mewn partneriaeth sifil neu briodas gyda menyw dan adran 42 Deddf Ffrwythloni Dynol ac Embryoleg 2008.
- Benyw sydd ddim mewn partneriaeth sifil nac wedi priodi â menyw ond sydd â chaniatâd dan adrannau 43 a 44 Deddf Ffrwythloni Dynol ac Embryoleg 2008.

Mae 'cwpl' yn golygu dau unigolyn sy'n byw mewn perthynas deuluol barhaus. Gallant fod o ryw wahanol neu'r un rhyw, yn briod, dibriod neu'n bartneriaid sifil.

Gall un unigolyn wneud cais i fabwysiadu plentyn ar yr amod fod yr unigolyn hwnnw yn 21 mlwydd oed (o leiaf) adeg gwneud y gorchymyn mabwysiadu, a'i fod:

- yn ddibriod/heb bartner sifil; neu
- yn bartner i fam, i dad neu i riant arall y plentyn sydd i'w fabwysiadu; neu'n
- briod neu â phartner sifil, ac yn gallu bodloni'r llys o un o'r canlynol:
 - na ellir dod o hyd i'w gŵr/gwraig neu bartner sifil ef/hi, neu
 - eu bod wedi gwahanu ac yn byw ar wahân, a bod yr ymwahaniad yn debygol o fod yn barhaol; neu
 - mae ei ŵr/wraig/bartner sifil yn analluog yn gorfforol i wneud cais neu'n analluog (o fewn ystyr Deddf Galluedd Meddyliol 2005) i wneud hynny.

a'i fod ef/ei bod hi:

- yn byw mewn rhan o Ynysoedd Prydain, neu
- wedi bod yn preswyllo'n arferol mewn rhan o Ynysoedd Prydain am gyfnod o flwyddyn o leiaf, gan ddiweddu gyda dyddiad y cais i'r llys.

Cymerir fel arfer fod 'domisil' yn golygu lleoliad eich cartref parhaol.

Yn gyffredinol, cymerir fod 'preswyllo'n arferol' yn cyfeirio at fyw yn arferol ac fel rheol mewn man penodol.

Os oes gennych unrhyw amheuaeth pa un ai ydych yn cwrdd â'r gofynion hyn ai peidio, dylech geisio cyngor cyfreithiol.

A oes rhaid i'r plentyn yr wyf eisiau ei fabwysiadu fyw gyda mi cyn y gallaf wneud cais am orchymyn mabwysiadu?

Os lleolwyd y plentyn gyda chi i'w fabwysiadu gan asiantaeth fabwysiadu, neu eich bod yn rhiant i'r plentyn, rhaid i'r plentyn fod wedi byw gyda chi (os ydych chi'n gwneud cais fel cwpl, gydag un neu'r ddau ohonoch) drwy'r amser yn ystod y 10 wythnos cyn i chi wneud cais i'r llys.

Fel arall, rhaid i'r plentyn fod wedi byw gyda chi:

- os ydych chi'n bartner i riant y plentyn, drwy'r amser yn ystod y 6 mis cyn eich cais;
- os ydych chi'n rhieni maeth i'r awdurdod lleol neu'n berthynas, drwy'r amser yn ystod y flwyddyn cyn eich cais;
- mewn unrhyw achos arall, am gyfnod o 3 blynedd (boed yn barhaol neu ddim) yn ystod y 5 mlynedd cyn eich cais.

Pwysig: Os na chafodd y plentyn yr ydych yn dymuno ei fabwysiadu ei leoli gyda chi gan asiantaeth fabwysiadu, mae'n rhaid i chi hysbysu'r awdurdod lleol ar gyfer yr ardal yr ydych yn byw ynddi o'ch bwriad i wneud cais am orchymyn mabwysiadu o leiaf dri mis cyn i chi gychwyn eich cais gyda'r llys.

Ble mae cychwyn fy nghais i fabwysiadu?

Gallwch wneud eich cais i unrhyw lys teulu yng Nghymru a Lloegr sy'n delio â materion mabwysiadu. Nid oes angen i chi wneud cais i'r llys a wnaeth unrhyw orchymyn blaenorol.

Gallwch ddod o hyd i restr lawn o lysoedd, a gwybodaeth ynghylch y math o waith y maent yn ei wneud, ar-lein yn courttribunalfinder.service.gov.uk.

Sylwch - os byddwch yn cychwyn eich cais yn eich llys lleol, mae posibilrwydd y gall y rhiant/rhieni geni ddod yn ymwybodol o ba ran o'r wlad yr ydych yn byw ynddi.

A ellir gwrando ar fy nghais mewn adeilad llys arall?

Gallwch ysgrifennu at y Barnwr yn gofyn i symud y gwrandawriad i lys arall. Os yw'r Barnwr yn cytuno, bydd y llys yn anfon hysbysiad at bawb sydd ynghlwm â'r achos yn dweud wrthynt beth yw amser, dyddiad a lleoliad newydd yr apwyntiad.

A fydd rhaid i mi dalu ffi?

Mae ffi'n daladwy am geisiadau i fabwysiadu. Gofynnwch i staff y llys am fanylion neu am gopi o daflen *EX50 - Ffioedd Llys Sifil a Llys Teulu*. Hefyd, mae ar gael ar-lein yn hmctsformfinder.justice.gov.uk.

Os ydych yn cyflwyno ceisiadau ar gyfer brodyr a chwiorydd ar yr un pryd, dim ond un ffi sy'n daladwy.

Efallai y bydd eich sefyllfa ariannol yn golygu na fydd yn rhaid i chi dalu ffi i'r llys, er enghraifft, os ydych chi'n derbyn math arbennig o fudd-dal sy'n seiliedig ar brawf modd neu y byddech yn dioddef caledi ariannol pe byddech yn talu'r ffi. Mae'r llyfryn a'r ffurflen gais cyfunol, sef *EX160A Ffioedd Llysoedd a Thribiwnlysoedd – a oes rhaid i mi eu talu?* yn rhoi rhagor o wybodaeth. Mae ar gael o'r llys neu ar-lein yn hmctsformfinder.justice.gov.uk.

Pa ffurflenni a dogfennau fydd y llys eu hangen?

Bydd y llys angen:

- eich Ffurflen A58 wedi'i llenwi (Cais am Orchymyn Mabwysiadu) a thri chopi;
- copi ardystiedig o dystysgrif geni lawn ar gyfer y plentyn, neu os yw'r plentyn wedi'i fabwysiadu'n flaenorol, copi ardystiedig o'r cofnod yn y Gofrestr Plant Mabwysiedig.

Efallai y bydd yn rhaid i chi hefyd ddarparu unrhyw rai o'r canlynol, gan ddibynnu ar eich amgylchiadau:

- os yw'r plentyn wedi'i leoli ar gyfer ei fabwysiadu neu wedi'i ryddhau i'w fabwysiadu gan lys, copi ardystiedig o'r gorchymyn lleoli neu'r gorchymyn rhyddhau;
- os ydych chi'n gofyn i'r llys hepgor caniatâd unrhyw riant neu warcheidwad i'r mabwysiadu, datganiad byr o'r ffeithiau yr ydych yn dibynnu arnynt i gefnogi'r cais (a elwir yn 'Datganiad Ffeithiau') a dau gopi o'r datganiad;
- os ydych chi'n cyflwyno tystiolaeth o'ch priodas neu bartneriaeth sifil, copi ardystiedig o'ch dystysgrif briodas neu dystysgrif partneriaeth sifil;
- os yw eich gŵr, gwraig neu bartner sifil wedi marw, copi ardystiedig o'r dystysgrif farwolaeth;
- os ydych chi wedi cael ysgariad neu fod eich partneriaeth sifil wedi'i diddymu, copi o unrhyw ddyfarniad absoliwt neu ddyfarniad yn dirymu'ch priodas, neu gopi o unrhyw orchymyn diddymu neu ddirymu eich partneriaeth sifil;
- adroddiadau meddygol ar wahân ar eich iechyd chi, iechyd y plentyn (a'r ceisydd arall) a baratowyd yn ystod y cyfnod o dri mis cyn dyddiad eich cais. Ni fydd raid i chi gyflwyno adroddiadau meddygol os lleolwyd y plentyn gyda chi gan asiantaeth fabwysiadu, neu ei fod ef/hi'n blentyn i chi neu'n blentyn i'r ceisydd arall, neu eich bod yn gwneud cais ar eich pen eich hun fel partner (gan gynnwys gŵr, gwraig neu bartner sifil) i'r fam, i'r tad neu i'r rhiant arall.

Nid yw hon yn rhestr gynhwysfawr o'r dogfennau y gallai'r llys fod eu hangen. Fe welwch restr o'r dogfennau sydd i'w rhoi ynghlwm ar y ffurflen gais A58. Os nad ydych chi'n siŵr a yw unrhyw eitem ar y rhestr yn berthnasol i chi, efallai y bydd staff y llys yn gallu eich cynorthwyo, fodd bynnag ni allant roi cyngor cyfreithiol.

Ymhle y gallaf gael copi o dystysgrif farwolaeth, tystysgrif briodas neu bartneriaeth sifil, neu dystysgrif geni lawn y plentyn os nad oes un gennyf?

Os bu i chi briodi yng Nghymru neu Loegr, neu os cafodd y plentyn ei eni yng Nghymru neu Loegr, gallwch gael copi ardystiedig gan:

- swyddfa'r Cofrestrydd Genedigaethau, Priodasau a Marwolaethau ar gyfer y dosbarth lle y bu i chi briodi, neu'r dosbarth lle cafodd y plentyn ei eni. Gallwch gael y cyfeiriad o'r llyfr ffôn.
- Mae'r Swyddfa Gofrestru Gyffredinol (GRO) yn gorchwyllo gwasanaeth cofrestru lleol i'r cyhoedd yng Nghymru a Lloegr. Certificate Services Section, General Register Office, PO Box 2, Southport PR8 2JD (Ffôn: 0300 123 1837) neu gallwch archebu tystysgrif newydd ar-lein yn www.gro.gov.uk

Os cofrestrwyd eich partneriaeth sifil yng Nghymru neu Loegr, dylech gysylltu â'r awdurdod cofrestru lle cofrestrwyd y bartneriaeth sifil.

Os bu i chi briodi neu y cofrestrwyd eich partneriaeth sifil yn Yr Alban neu yng Ngogledd Iwerddon, neu y cafodd y plentyn yr ydych yn dymuno ei fabwysiadu ei eni yn un o'r gwledydd hyn, gallwch gael rhagor o wybodaeth gan:

- The General Register Office for Scotland, New Register House, 3 West Register Street, Caeredin, EH1 3YT (Rhif Ffôn: 0131 334 0380); neu
- The General Register Office, Oxford House, 49-55 Chichester Street, Belfast, BT1 4HL (Rhif Ffôn: 0300 200 7890).

Dalier Sylw: Bydd rhaid i chi dalu ffi i wneud cais i gael copi o'r dystysgrif. Bydd y swyddfa'n dweud wrthyf faint fydd hyn.

Beth os nad yw rhieni'r plentyn yn caniatáu'r mabwysiadu?

Dalier Sylw: nid yw hyn yn berthnasol i blant sy'n destun gorchmynion lleoli neu orchmynion ryddhau.

Os nad yw rhieni (sydd â chyfrifoldeb rhiant) y plentyn neu'r gwarcheidwad wedi rhoi caniatâd i'r mabwysiadu, a'ch bod yn gofyn i'r llys hepgor eu caniatâd hwy, bydd angen i'r llys fod yn fodlon:

- na ellir dod o hyd i'r rhiant neu'r gwarcheidwad, neu nad oes ganddynt hwy allu (o fewn ystyr Deddf Galluedd Meddyliol 2005) i roi caniatâd, neu
- fod lles y plentyn yn ei gwneud yn ofynnol i hepgor eu caniatâd hwy.

Rhaid i chi nodi ar eich ffurflen gais pa un o'r amodau hyn sy'n berthnasol. Bydd angen i chi hefyd atodi datganiad byr o'r ffeithiau yr ydych yn dibynnu arnynt i gefnogi eich cais. Gelwir y datganiad hwn yn 'Datganiad Ffeithiau'.

Bydd y llys yn anfon copi o'r Datganiad Ffeithiau at bob un o rieni neu warcheidwaid y plentyn, felly os ydych yn bwriadu gofyn i'r llys gadw pwy ydych yn gyfrinachol, dylech sicrhau nad yw'r datganiad ffeithiau'n cynnwys unrhyw wybodaeth a allai ddatgelu pwy ydych, ble rydych yn byw na ble mae'r plentyn yn mynd i'r ysgol neu feithrinfa.

Beth os caiff y cais ei herio?

Os nad yw'r rhieni geni (neu rywun arall sydd â chyfrifoldeb rhiant) wedi cydsynio i'ch cais i fabwysiadu, yna mae ganddynt hawl i wneud cais i'r llys i wrthwynebu'r gorchymyn mabwysiadu. Os yw'r plentyn wedi'i osod gyda chi ar gyfer ei fabwysiadu gan asiantaeth fabwysiadu, yna bydd rhaid iddynt yn gyntaf wneud cais am ganiatâd i wrthwynebu'r gorchymyn mabwysiadu.

Gallai hyn arwain at ohirio eich cais nes bydd y mater wedi'i ddatrys. Mae'n debygol y bydd yr achos yn cael ei restru ar gyfer gwrandawriad pellach, a bydd gwrthwynebiad y rhieni geni i'r cais i fabwysiadu yn cael ei ystyried bryd hynny. Bydd pob achos yn cael ei asesu yn ôl ei deilyngdod ei hun a bydd ganddynt faterion unigryw sy'n ymwneud ag amgylchiadau'r plentyn dan sylw a'r sawl sy'n dymuno gwrthwynebu'r mabwysiad.

Pan fo'r plentyn dan sylw wedi'i leoli gyda chi i'w fabwysiadu gan asiantaeth fabwysiadu, bydd rhaid i riant neu rywun sydd â chyfrifoldeb rhiant ddangos y canlynol os ydynt yn dymuno cael caniatâd i wrthwynebu neu am wrthwynebu eich cais am orchymyn mabwysiadu yn llwyddiannus:

1. newid yn eu hamgylchiadau; a'i
2. fod er lles y plentyn i roi caniatâd

Beth ddylwn ei wneud os nad wyf yn dymuno datgelu pwy ydwyf?

Os nad ydych yn dymuno i riant/rhieni neu warcheidwad/gwarcheidwaid y plentyn yr ydych yn bwriadu ei fabwysiadu wybod pwy ydych, gallwch ofyn i'r llys roi 'rhif cyfresol' i chi. Bydd hyn yn sicrhau y bydd unrhyw ddogfennau a anfonir at riant/rhieni neu warcheidwad/warcheidwaid y plentyn wedyn yn nodi'r rhif hwn ac nid eich manylion personol. Yn ogystal, os oes gofyn i chi a rhieni neu warcheidwaid y plentyn fod yn bresennol yn yr un gwrandawriad llys, bydd y llys yn gwneud trefniadau i sicrhau, trwy gydol yr amser, na ddatgelir pwy ydych.

Beth fydd yn digwydd pan fyddaf wedi gadael y cais gyda'r llys?

Anfonir ffurflen atoch fydd yn dweud wrthyfch fod eich cais wedi'i gyflwyno. Os byddwch angen derbynneb am y ffi, sicrhewch eich bod yn gofyn amdani adeg gwneud y cais. Mae pob achos yn wahanol a bydd penderfyniad y llys ynglŷn â'r camau nesaf yn dibynnu ar

fanylion eich cais, ond mae'n debygol y bydd rhai neu bob un o'r canlynol yn digwydd:

- Efallai y bydd y llys yn gofyn i swyddog o Wasanaeth Cyngori a Chynorthwyo Llys i Blant a Theuluoedd (Cafcass) neu CAFCASS Cymru gael ei benodi i weithredu fel gwarcheidwad plant, cynghorydd plant a theuluoedd, neu swyddog adrodd. Gall yr un swyddog weithredu'r tair swyddogaeth.
- Gofynnir i'r asiantaeth fabwysiadu neu'r awdurdod lleol i baratoi adroddiad ar gyfer y llys yn rhoi manylion am y plentyn, amdanoch chi a'ch teulu, unrhyw riant neu warcheidwad i'r plentyn a gwybodaeth gefndirol arall a allai gynorthwyo'r llys.
- Efallai y bydd y llys yn trefnu gwrandawriad (a elwir yn 'gwrandawriad cyfarwyddo cyntaf'). Bydd hwn fel arfer yn digwydd oddeutu 4 wythnos ar ôl i'ch cais gyrraedd y llys. Anfonir manylion am y gwrandawriad hwn atoch chi neu at eich cyfreithiwr, at rieni'r plentyn, at unrhyw unigolyn arall sydd â chyfrifoldeb rhieni dros y plentyn ac at unrhyw unigolyn sy'n paratoi adroddiad ar gyfer y llys neu sy'n gweithredu ar ran yr awdurdod lleol, yr asiantaeth fabwysiadu, neu'r plentyn.

Beth yw swydd y gwarcheidwad plant, y cynghorydd plant a theuluoedd a'r swyddog adrodd?

Lle gwneir y plentyn yn barti yn yr achos llys, bydd y llys yn penodi gwarcheidwad plant i weithredu ar ran y plentyn mewn unrhyw wrandawriad llys. Rhaid i'r gwarcheidwad plant gyflwyno adroddiad i'r llys yn cyngori ar fuddiannau'r plentyn ac yn rhoi unrhyw gyngor arall y gofynnir amdano gan y llys.

Pan fydd y llys yn ystyried cais i fabwysiadu, gallai benodi cynghorydd plant a theuluoedd i wneud unrhyw ymholiadau angenrheidiol a pharatoi adroddiad ar les y plentyn.

Os bydd rhiant neu warcheidwad y plentyn yn ymddangos yn fodlon i ganiatáu mabwysiadu, ond heb wneud hynny eisoes, bydd y llys yn penodi swyddog adrodd i dystio i arwyddo'r ffurflen gydsynio ac i gyflwyno adroddiad ar unrhyw faterion a allai gynorthwyo'r llys wrth ystyried y cais i fabwysiadu. Os nad yw'r rhiant neu'r gwarcheidwad yn fodlon rhoi caniatâd, rhaid i'r swyddog adrodd gyflwyno adroddiad i'r llys yn egluro pam.

Beth yw gwrandawriad cyfarwyddo cyntaf?

Apwyntiad yw gwrandawriad cyfarwyddo cyntaf pan fydd y llys yn ystyried eich cais ac yn gwneud penderfyniadau (a elwir yn 'gyfarwyddiadau') ynghylch materion megis:

- yr amserlen ar gyfer ffeilio unrhyw adroddiadau gan asiantaeth fabwysiadu, awdurdod lleol neu Cafcass/CAFCASS Cymru, ac unrhyw dystiolaeth arall;
- a oes unrhyw wallau neu fylchau yn eich cais neu'r dogfennau ategol y mae angen eu cywiro;
- os na leolwyd y plentyn gyda chi gan asiantaeth fabwysiadu, a oes angen i chi roi datganiad i'r llys yn egluro cefndir eich cais a'ch rhesymau dros ddymuno mabwysiadu;

- olrhain rhieni geni y plentyn, os na ddaethpwyd o hyd i'r tad na'r fam na'r rhiant arall;
- defnyddio dulliau amgen o ddatrys anghydfod ar gyfer datrys unrhyw faterion a ymleddir;
- a ddylai'r plentyn, neu unrhyw unigolyn arall, gael ei wneud yn barti i'r cais;
- a ddylid trosglwyddo'r achos i lys uwch;
- a oes angen gwrandawriad cyfarwyddo pellach; ac
- os yw'n bosibl, dyddiad a lleoliad y gwrandawriad terfynol. Yn y gwrandawriad terfynol y gwneir y gorchymyn mabwysiadu, os mai dyna fydd penderfyniad y llys.

Anfonir copi o'r gorchymyn sy'n esbonio'r cyfarwyddiadau y mae'r llys wedi'u gwneud, atoch chi neu at eich cyfreithiwr.

Unwaith y bydd cyfarwyddiadau wedi'u rhoi, bydd y llys yn monitro cynnydd eich achos i sicrhau y cydymffurfir â'r amserlen ac unrhyw gyfarwyddiadau.

Beth fydd yn digwydd os bydd y llys yn penderfynu gwneud gorchymyn mabwysiadu?

Unwaith y bydd Gorchymyn Mabwysiadu wedi ei ganiatáu, anfonir copi o'r Gorchymyn Mabwysiadu sy'n berthnasol i bob plentyn atoch gan y Llys lle cynhaliwyd y gwrandawriad Mabwysiadu.

Fe'ch gwahoddir i fynychu gwrandawriad dathlu gyda'ch plentyn / plant. Cewch ofyn i'r gwrandawriad hwn gael ei gynnal yn eich llys teulu lleol.

Bydd y Llys hefyd yn anfon copi o'r Gorchymyn Mabwysiadu i'r Swyddfa Gofrestru Gyffredinol (GRO) yn Southport, Glannau Mersi a fydd yn defnyddio'r wybodaeth sydd yn y Gorchymyn Mabwysiadu i roi cofnod ar y Gofrestr Plant Mabwysiedig. Yna cynhyrchir tystysgrif geni newydd gydag enw'r plentyn ar ôl mabwysiadu. Gelwir y ddogfen hon yn dystysgrif mabwysiadu a bydd yn cymryd lle'r dystysgrif geni wreiddiol ar gyfer pob pwrpas cyfreithiol.

Darllenwch y cwestiynau ac atebion canlynol yn ofalus, gan ei bod yn bwysig iawn bod yr holl fanylion ar y Gorchymyn Mabwysiadu yn gywir cyn bydd y cofnod yn cael ei roi ar y Gofrestr Plant Mabwysiedig, gan y bydd yr wybodaeth hon yn ymddangos ar y dystysgrif mabwysiadu newydd.

Beth ddylwn i wneud pan fyddaf yn cael y Gorchymyn Mabwysiadu?

Gwiriwch fod yr holl fanylion ar eich copi o'r Gorchymyn Mabwysiadu yn gywir, a rhowch wybod i'r Llys ar unwaith os oes problem fel y gellir cynhyrchu Gorchymyn diwygiedig a'i anfon i'r Swyddfa Gofrestru Gyffredinol. Defnyddiwch y rhestr wirio hon i sicrhau bod yr holl

fanylion yn gywir:

A yw'r holl enwau wedi'u nodi gan gynnwys enwau canol?

A yw'r enwau i gyd wedi eu sillafu yn gywir?

A yw'r holl ddyddiadau a ddangosir yn gywir?

Gall methu â gwirio eich Gorchymyn Mabwysiadu achosi oedi wrth wneud cofnod ar y Gofrestr Plant Mabwysiedig, ac efallai y bydd rhaid i chi dalu ffi arall i gael tystysgrif mabwysiadu arall os bydd angen newid y cofnod cofrestru ar ddyddiad diweddarach.

Faint fydd yn cymryd i mi gael y dystysgrif geni newydd?

Mae'r amser prosesu yn oddeutu pedair wythnos unwaith y bydd y GRO wedi cael y Gorchymyn Mabwysiadu gan y Llys. Pan fydd y gorchymyn mabwysiadu wedi'i brosesu, byddwch wedyn yn gallu gwneud cais am dystysgrif mabwysiadu. Yr amseroedd prosesu yw 15 diwrnod ar gyfer gwneud cais am dystysgrif safonol ac 1 diwrnod ar gyfer gwneud cais am dystysgrif â blaenoriaeth.

Beth fydda i'n ei gael gan y Swyddfa Gofrestru Gyffredinol?

Byddwch yn cael llythyr yn cadarnhau fod y cofnod wedi'i wneud yn y Gofrestr Plant Mabwysiedig a sut i wneud cais am gopiau o dystysgrif fer neu dystysgrif lawn. Sylwch bydd y dystysgrif lawn yn cyfeirio'n glir at y ffaith bod y plentyn wedi ei fabwysiadu. Gan amlaf mae angen tystysgrif lawn ar gyfer pwrpas cyfreithiol a gweinyddol, a bydd angen y fersiwn llawn i gefnogi cais am basbort i'r plentyn. Mae hi'n bwysig nad ydych yn trefnu gwyliau lle bydd angen pasbort tan y byddwch wedi cael pasbort newydd y plentyn gyda'u henw newydd.